

als in der jetzigen vermeyntlichen klugen Welt/ in welcher der Bauch gleichsamb der Menschen Gott ist worden/ dem sie ohn vnterlaß fleißig vnd trewlich dienen/ mit so mancherley künstlich zubereiteten Speisen vnd Geträncken/ daß man wol möchte sagen/ es sey der Abgott Bel zu Babel niemals so fräßig vnd begirig gewesen/ als der jetzigen Welt Abgott Venter, dem sie alle Tage/ ja fast alle Augenblick etwas neues auffopffern muß/ dafür sie nichts anders zu Lohn/ oder Vergeltung bekompt/ als endliche Armuth/ allerhand alte vnd neue beschwerliche Kranckheiten/ vnd Verführung ihres Lebens/ daß ich des ewigen Wehes/ so auch endlich vber sie kompt/ geschweige. Vnd siehet man nichts gemeiners in der ganzen Welt/ vnd in allen Ständen/ als einen grossen hauffen abgöttischer Bauchdiener/ die alle ihre Andacht nirgendt anders hinrichten/ als auff niedliche Bislein/ als wenn sie durch ein allgemeines leuten der Glocken darzu ermahnet/ zur Küchen zu lauffen/ so bald sie auffwachen/ als wann es ihre Kirche were/ zur Speißkammer eilen/ als zum Altar/ zum Keller/ als zur Sacristen/ zum Hünerhauß/ als zum Ort/ da ihre Victimæ, oder Opffer behalten werden: Vnd ist ihnen der Geruch eines frischen Bratens viel lieblicher/ als Weyrauch/ des trieffenden Fetts/ als Storax, das Krächeln in den Bratpfannen/ als eine Drügel/ vnd der Gebackens Pfannen/ als die allerbeste Music/ die man vorbringen oder erdencken möchte.

Es hat aber diese Profession ihren Anfang in Asia bekommen/ wie dann die Asiatische Völcker beydes hierinn/ vnd in allen andern vppigen Dingen/ den guten Namen haben/ daß sie bey ihnen erstlich seyen erfunden worden/ vnd haben es hiermit auch so weit gebracht/ daß man in der gemeinen Rede einen

fräßigen Menschen/ einen Asianer genennet hat/ wie sie dan selbstten auch von wegen ihres vbermäßigen vnd vppigen fressens vnd sauffens Asoti genennet worden. Dannther ist/ wie Titus Liuius meldet/ nach den Victorien/ so die Römer in Asia gehabt/ der Vberfluß in Essen vnd Trincken gen Rom gebracht worden/ vnd hat man angefangē die Speisen mit mehrer curiositet vnd fleiß/ als zuvor/ zu bereiten/ vnd die Köche angefangen sich zu seheit lassen/ da sie zuvor zum eussersten veracht gewesen/ vnd hat sich mancher/ so auß einer rauhigen Küchen gekrochen/ dörfffen vnter stehen/ gleichsam als ein Professor in einer Academia. Bücher von dieser Leckkunst zuschreibē/ da je einer vber den andern seyn wollen/ also daß man allerhand Disputaten/ wie in einer hohen Schul/ darüber gehalten/ wie sich damit auch gleichsamb fürtreffliche Doctores, oder Coctores darinn gefunden.

Vnter andern hat bey den Römern einer/ so Apicius genant/ den Vorzug gehabt/ von welchem/ wie Septimius Florus meldet/ zur nachfolg der berühmten Philosophen auch eine Sect entstanden/ daß die/ so die Kunst von ihm gelernet/ Apiciani genennet worden/ vnd ist dieser Oberkoch/ welchen Plinius einen Abgrund aller Verschwendung nennet/ so vermessen gewesen/ daß er eine Küchenschule auffgerichtet/ vnd die Küchenkunst öffentlich in die Statt eyngeführt/ auß welcher zuvor auch wol die Philosophi/ als Verführer vnd Verderber der Jugend/ sind verbandt worden. Hernach aber haben sich noch andere mehr/ so wol bey den Græcis als bey den Latinis gefunden/ welche sich dieser Kunst angenommen/ vnd grosse herrliche Bücher/ oder Tractatus darvon geschrieben/ als von einer ehrlichen/ ja nothwendigen Disciplin/ dabey beydes hohes vnd nidrigs Standspersonen köndten Ehre eynlegen: welche Meynung die ganze Welt